

NO. SOALAN: 14

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : DATO' SERI HAJI ABDUL HADI BIN AWANG
[MARANG]
TARIKH : 20.3.2017 (ISNIN)

Dato' Seri Haji Abdul Hadi Bin Awang [Marang] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sejauh mana langkah Kerajaan untuk mengurangkan inflasi dan mengawal kenaikan harga barang selepas Akta Kawalan Harga dan Anti Pencatutan luput akhir tahun lepas.

JAWAPAN :

Tuan Yang Di-Pertua,

Kementerian Perdagangan Dalam Negeri, Koperasi dan Kepenggunaan menggunakan perundangan Akta Kawalan Harga dan Antipencatutan 2011 sebagai langkah penguatkuasaan untuk mengawal harga barangan dalam negara. Mulai 1 Januari 2017 Kementerian telah menguatkuasakan Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah Bagi Barangan) 2016 bagi menggantikan Peraturan-Peraturan Kawalan Harga dan Antipencatutan (Mekanisme Untuk Menentukan Keuntungan Tinggi Yang Tidak Munasabah) (Margin Keuntungan Bersih) 2014 yang telah tamat kuatkuasanya pada 31 Disember 2016. Peraturan baru ini merupakan langkah Kerajaan yang berterusan untuk bertindak terhadap aktiviti pencatutan dengan tujuan mengawal kenaikan harga barang serta inflasi.

Peraturan yang dikuatkuasa ini adalah kaedah perundangan yang digunapakai Kementerian bagi memastikan pengambilan keuntungan yang diperolehi oleh peniaga bagi sesuatu barangan adalah munasabah dan terkawal serta selaras dengan tanggungan kos.

Antara langkah-langkah yang telah diambil Kementerian adalah:

- i. melaksanakan **Skim Kawalan Harga Musim Perayaan** juga dilaksanakan bagi mengawal harga barang keperluan musim perayaan tertentu semasa musim-musim perayaan utama dalam negara;
- ii. menguatkuasakan **Perintah Kawalan Harga (Penandaan Harga oleh Penjual Runcit) 1993** bagi mewajibkan peniaga

meletak tanda harga ke atas barangan yang dijual atau mempamerkan senarai harga;

- iii. mewujudkan **Skwad Tindakan Aduan Rakyat (STAR)** dan **Special Action Squad (SAS)** dalam usaha untuk menyelesaikan aduan rakyat melalui tindakan yang cepat dan pantas;
- iv. meningkatkan **keberadaan (omnipresence)** pegawai-pegawai penguatkuasa di tempat-tempat terpilih yang menjadi tumpuan orang ramai bagi mewujudkan ruang persekitaran perniagaan yang selamat dan beretika melalui kehadiran pegawai penguatkuasa; dan
- v. menjalankan **pemantauan harga barangan keperluan asas di seluruh negara di bawah Program Pemantauan Harga oleh Pegawai Kementerian.**